



Komunikadu imprensa

15 Fevereiru 2019

JSMP lansa relatóriu kona-ba dezafiu sira iha prosesu sivil iha Timor-Leste

Ohin 15 Fevereiru 2019, Judicial System Monitoring Program (JSMP) ho apoiu finanseiru husi Embaxada Australia liuhusi Programa DFAT lansa relatóriu importante ida ho titlu '**Relatóriu no Rekomendasaun sira ba reforma prosesu sivil iha Timor Leste**'.

Relatóriu ne'e subliña kestaun sira kona-ba direitu Sivil, problema adisionál husi impedimentu iha área direitu sivil, problema polítika sira iha área direitu sivil enfrenta, deskrisaun jerál kona-ba dezafiu sira ne'ebé identifika iha períodu 2018, implementasaun reforma lejislativu iha área direitu sivil no rekomendasaun hodi reforma direitu sivil.

Inisiativa hosi prodús relatóriu ne'e bazeia ba JSMP nia deskobrimentu katak asesu ba assisténsia no julgamentu sira iha tribunál ba kazu sivil la funsiona, efikásia no prosesu julgamentu kuaze lala'o, liuliu ba kazu sira ligadu ho asuntu komérsiu.

Relatóriu ne'e ho objetivu prinsipál mak atu enkoraza no rekomena ba instituisaun relevante sira hanesan Governu, Parlamentu Nasionál no Tribunál atu bele kria kondisaun sira ne'ebé nesésáriu hodi responde ba difikuldade sira ne'ebé deskreve iha relatóriu ne'e ni aseguara prosesu sira la'o ho maneira ida-ne'ebé efikás no iguál ba parte sira iha prosesu sivil.

"JSMP preokupa ho kondisaun atuál ne'ebé liga ho atendimentu ba prosesu sivil iha justisa formal ne'ebé tuir JSMP nia dados hatudu katak, prosesu ba kazu sivil la hetan atensaun ne'ebé seriu tanba de'it falta kondisaun sira inklui la iha polítika ida-ne'ebé propriu hodi kapasita setór judisiáriu ne'ebé prejudika interesadu sira ninia direitu no hamenus konfiansa publiku iha prosesu sivil," dehan Luis de Oliveira Sampaio, Diretór Ezekutivu JSMP.

Relatóriu ne'e nu'udar meius ida ne'ebé JSMP uja hodi avalia dezempeñu setór justisa partikularmente iha prosesu sivil sira no ninia implikasaun potenciál ba setór sira seluk iha kuadru no âmbito desenvolvimento ekonomia iha ita nia rain. Dezafiu no lakuna sira ne'ebé deskobre iha relatóriu ne'e la estimula investor sira atu halo investimentu iha Timor-Leste tanba la sente seguru no ladun iha konfiansa ba prosesu sivil iha tribunál.

Bazeia ba deskobrimentu sira ne'e hotu, JSMP husu ba instituisaun relevante sira, Governu, Parlamentu Nasionál no Tribunál atu tau iha konsiderasaun ba preokupasaun no rekomendasaun sira husi relatóriu ne'e. Relatóriu ne'e disponivel iha lian Tetun no Inglés iha: www.jsmp.tl

Se iha dúvida ka pergunta no komentáriu ka kritika ruma relasiona ho relatóriu ne'e bele kontaktu ba:

Luis de Oliveira Sampaio

Diretór Ezekutivu JSMP

Email: luis@jsmp.tl

Telefone: 3323883

www.jsmp@tl